

POPERA GA PIRIPUWA JEXMAGÜXÛ GA JAXÕGÜXÛTANÜWA NAMUXÛ GA PAURU

**Pauru rü nüxü narümoxê ga jema
jaxõgüxü ga Piripuwa jexmagüxü**

1 ¹Pa Toeneëgü ja Piripuwa Ngëxmagüxex, chama i Pauru rü namaã i taeneë i Timúteu nixí i pexçax tanaxümatüxü i nhaã popera. Rü toma rü Ngechuchu ja Cristuarü puracütanüxü tixígü. Rü pexçax tanaxümatü i pema i jaxõgüxüãrü ãëxgacügü na peixígüxü, rü pema i tupaucawa ngüxêetaeruügü na peixígüxü, rü guxãma i pema i Ngechuchu ja Cristuaxü jaxõgüxe. ²Rü chanaxwaxe i Tanatü ja Tupana rü tórü Cori ja Ngechuchu ja Cristu poraãcü pexü narüngüxêë rü pexü nataãëxêë.

**Pauru rü jema jaxõgüxüçax
najumuxê**

³Rü guxüguma i ngëxguma pexna chacuãxãchixügu rü Tupanana moxê chaxã i pexçax. ⁴Rü ngëxguma chajumuxëgux, rü guxüguma chataãëãcuma pexçax chajumuxê i guxãma i pemax. ⁵Erü pema rü noxritama Tupanaãrü orexü

pexinüëgumama rü poraãcü choxü perüngüxêë na nüxü chixuxüçax i norü ore i mexü. Rü nhuxma rü ta choxü perüngüxêëgüecha. ⁶Rü Tupana rü marü inanaxügü i wüxi i mexü i puracü i perü maxüwa. Rü nüxü chacuãx rü nüma rü guxügutáma nanaxüecha i ngëma puracü nhuxmatáta janguxêëã i ngëxguma ínanguxgu ja Ngechuchu ja Cristu. ⁷Rü aixcuma name na ngëmaãcü pemaã nagu charüxinüxü, erü poraãcü pexü changechaü rü aixcuma Tupana wüxigu tüxü narüngüxêë i guxãma i jixema. Rü woo nhuxma na chapocuxü rü exna ega ãëxgacügüpexewa choxü nagagügu, rü Tupana choxü narüngüxêë i ngëxguma norü ore i mexüétüwa chidexagu rü namaã nüxü chixuxgu i ãëxgacügü na aixcuma jixü i ngëma orewa nüxü ijarüngauxü i tórü maxü i taguma gúxü. Rü nüxü chacuãx rü ngëma Tupana choxü nangüxêëxüãcuma rü pexü rü ta narüngüxêë. ⁸Rü Tupana nüxü nacuãx na nhuxãcü poraãcü pexü chadauxchaüxü rü pexü na changechaüxü i guxãma i pemax,

ngêma Ngechuchu ja Cristu pexũ na ngechaũxũrũũ. ⁹Rũ chorũ jumuxêwa naxçax íchaca na jexeraãcü pegũ pengechaũgũxũçax rü Tupanaxũ pengechaũgũxũçax. Rũ naxçax íchaca na jexeraãcü nüxũ pecuáxũçax i guxũma i Tupanachiga rü jexeraãcü nüxũ pecuáxũçax na nhuxãcü nanaxwaxexũ na naxçax pemaxêxũ. ¹⁰Rũ ngêmaãcü pexçax çajumuxê erü chanaxwaxe na meã penangugũxũ i ãcü nixĩ i aixcuma mexũ i Tupanapexewa na penaxũxũçax i ngêma. Rũ chanaxwaxe na aixcuma namexũ i perũ maxũ na taxuũçaxma ãcüçax Tupana pexna çaxũçax i ngêxguma ínanguxgu ja Cristu. ¹¹Rũ naxçax íchaca na Ngechuchu ja Cristu pexũ narũngũxêxũ na aixcuma namexũçax i perũ maxũ rü aixcuma penaxũxũçax i ngêma Tupanapexewa mexũ na ngêmaãcü meã pemaxêãcüma Tupanaxũ peicuaxũgũxũçax.

Chauxçax rü Cristuarũ ngúchaũ na chaxũxũçax nixĩ i chamaxũxũ

¹²Pa Chaueneêgũx, rü chanaxwaxe i nüxũ pecuax rü guxũma i ngêma choxũ üpetũxũ, rü aixcuma ngêmaãcü choxũ naxüpetũ na jexeraãcü natachigaxũçax i Tupanaãrũ ore i mexũ. ¹³Rũ nhuxma i núma rü guxũma i churaragũ i ãêxgacüpataarũ daruũgũ rü guxũma i togũ rü ta nüxũ nacuaxgũ na chapocuxũ naxçax na Cristuarũ duũxũ çhĩxũ. ¹⁴Rũ nhuxma na chapocuxũ rü muxũma i taeneêgũ i jaxôgũxũ rü tama namuũêãcüma nüxũ nangúchaũ na nüxũ jaxugüexũ i Tupanaãrũ ore i mexũ. Rũ jexeraãcü tórũ Coriaxũ najaxôgũ. ¹⁵Rũ aixcuma nixĩ i nhuxre i duũxũgũ

rü togũxũ na jaxauxãchixêxũçaxmare nüxũ nixugüexũ i Cristuchiga, erü togũxũ narũjexerachãũ. Notürũ nangêxma i togũ i duũxũgũ i aixcuma mexũgu naxĩnũêãcüma meã nüxũ ixugüexũ i ngêma ore. ¹⁶Rũ nhuxre i duũxũgũ rü Cristuchigaxũ nixugüe erü choxũ nangechaũgũ rü nüxũ nacuaxgũ na Tupana nuxma choxũ muxũ na íchanapoxũxũçax i norũ ore i mexũ. ¹⁷Notürũ nangêxma i togũ i noxrütama ngúchaũçax daugũxũ rü ngêmacax nüxũ ixugüexũ i ngêma ore. Rũ nũmagũ rü tama mexũgu narũxĩnũê, notürũ naxçax nadaugũ na jexeraãcü choxũ naguxchaxêêgũãxũ i nhuxma na chapocuxũ. ¹⁸⁻¹⁹Notürũ nüêtama nixĩ ega woo ngêmaãcü jixĩgu. Erü woo mexũ i norũ ngúchaũmaã jixĩgu rü exna tama, notürũ Cristuchigaxũ nixugüe. Rũ ngêma rü wüxi i taãê nixĩ i chauxçax. Rũ guxũgutãma chataãêêcha erü nüxũ chacuax rü guxũma i ngêma rü chorũ mexũçax tá nixĩ erü chauxçax pejumuxêgũ rü choxũ narũngũxêê i Tupanaãê i Üünexũ i Ngechuchu ja Cristuxũ rüngũxêxũ. ²⁰Rũ ngêma poraãcü chanaxwaxexũ nixĩ na taguma ãcü rü chixexũ na chaxũxũ na taxuũçaxma chaugüçax çaxãnexũçax. Rũ chanaxwaxe i guxũguma íchamemare na guxãpexewa tama chamuũãcüma Cristuchigaxũ chixuxũ. Rũ nhuxma na chamaxũxũ rü chanaxwaxe i guxũguma aixrügumariũtama Cristuxũ chicuaxũ rü chanataxêê. Notürũ ngêxguma woo çajuxgux, rü chanaxwaxe i ngêmaãcü rü ta chanataxêê. ²¹Erü chauxçax rü Cristuarũ ngúchaũ na chaxũxũçax nixĩ i

na chamaxũxũ. Notũrũ ngẽxguma chajuxgux rũ ngẽma rũ ta name, erũ Cristuxũtawata tá changẽxma i ngẽxguma. ²²Notũrũ tama nũxũ chacuax i tacũ nixĩ i rũmemaẽxũ i chauxcax, ngẽma na chajuxũ rũ exna tama. Erũ nhuxma na chamaxũxũ rũ choxũ natauxcha na chanaxũxũ i tórũ Coriarũ puracũ. ²³Rũ ngẽmacax tama nũxũ chacuax na tacũ jiĩxũ i chauxcax rũmemaẽxũ i ngẽma taxrewa. Erũ nhuxguacũ rũ chanaxwaxe na chajuxũ na Cristuxũtawata changẽxmaxũcax. Rũ ngẽma nixĩ i aixcuma jexera rũmemaẽxũ i chauxcax. ²⁴Notũrũ i pexcax rũ nagu charũxĩnũ rũ narũmemaẽ nixĩ na nhama i chaxunemaãtama na chamaxũxũ na ngẽmaãcũ pexũ charũngũxẽxũcax. ²⁵Rũ nhuxma na aixcuma meã nũxũ chacuaxũ na pechaxwaxexũ, rũ ngẽmawa nũxũ chacuax na tãũxũtama paxa chajuxũ. Rũ ngẽmaãcũ tá chamaxãma na pexũ charũngũxẽxũcax na jexeraãcũ Cristucax pemaxẽxũcax rũ jexeraãcũ taãẽcũma nũxũ pejaxõgũxũcax. ²⁶Rũ ngẽmaãcũ wena táxaru petanũwa changẽxma. Rũ ngẽxguma wena choxũ pedaugũgu rũ aixcuma tá petaãẽgũ erũ tá pexũ nangẽxma na tacũcax Ngechuchu ja Cristuxũ peicuaxũũgũxũ. ²⁷Rũ ngẽma guxũãrũ jexera rũmemaẽxũ nixĩ na naxcax pedauxũ na meã pemaxẽxũ, ngẽma Cristuarũ ore pemaã nũxũ ixuxũrũ. Rũ ngẽxguma petanũwa chaxũxgu rũ exna woo tama ngẽma chaxũxgu, notũrũ nũxũ chaxĩnũchaũ na guxãma wũxigu pegũ peporaexẽxũ na taguma nũxũ perũchaxũcax na aixcuma pejaxõgũxũ, rũ ngẽmaãcũ

Tupanaãxũ pepuraciẽxũ na jexeraãcũ jaxũchigũxũcax i norũ ore i mexũ. ²⁸Rũ ngẽmacax penaxwaxe i tama texẽxũ pemuũẽacũma nũxũ peixugũama i ngẽma ore. Rũ ngẽma na tama nũxũ pemuũẽxũ rũ ngẽma rũ wũxi i cuaxruũ tá nixĩ nũxũ i peru uwanũgũ. Rũ ngẽmawa tá nũxũ nacuaxgũ na pocuwa tá naxĩxũ i nũmagũ notũrũ pema rũ tá maxũwa na pexĩxũ. Rũ Tupana tá nixĩ ja pexũ rũngũxẽcũ na tama nũxũ pemuũẽxũcax i ngẽma peru uwanũgũ. ²⁹Rũ Tupanaga nixĩ na Cristuaxũ pejaxõgũxũ. Rũ ngẽxgumarũ ta naga nixĩ na Cristucax ngũxũ peingegũxũ. Rũ ngẽma rũ wũxi i ngũxẽcũ nixĩ i pexna naxãxũ ja Tupana. ³⁰Pema rũ chama rũ wũxigu Tupanaãrũ puraciũwa tangẽxmagũ, rũ tanaxũama i ngẽma puracũ ega woo texẽ tũxũ naguxchaxẽegux. Rũ ũpa rũ marũ choxũ pedau na nhuxãcũ meã chanaxũxũ i ngẽma puracũ, rũ nhuxma rũ ta nũxũ pecuãchiga na nhuxãcũ chanaxũamaxũ rũ woo namu i chorũ guxchaxũgũ.

**Cristu rũ nhama taxuũma jiĩxũrũũ
nũgũ nixixẽẽ rũ jemacax ga Tupana
rũ guxũãrũ ãẽxgacũxũ najaxixẽẽ**

2 ¹Rũ dũcax, Pa Chaueneẽgũx, rũ nhuxma na Cristuarũ duũxũgũ peixĩgũxũ, ¿rũ aixcuma jiĩxũ i nũma pexũ nataãẽxẽxũ? ¿Rũ aixcuma jiĩxũ i petaãẽgũxũ erũ nũma pexũ nangechaũ? ¿Rũ aixcuma jiĩxũ i Tupanaãẽ i Üunexũ pexũtawata ngẽxmaxũ? ¿Rũ aixcuma jiĩxũ i pegũ pengechaũgũxũ rũ pegũxũ pengechaũtũmũũgũxũ? ²Rũ ngẽxguma chi ngẽmaãcũ jixĩgu, rũ chanaxwaxe i guxãma wũxigu perũxĩnũẽ, rũ aixcuma

guxãma pegü pengechaũgü, rü aixcuma guxãma nhama wüxitama peixĩxũrũũ na jĩixũ i peãẽ, rü guxãma wüxitama i ngúchaũcax pedau. Rü ngëxguma ngëmaãcü pemaxëgu rü wüxi i chorü taãẽ tá nixĩ. ³Rü tama name i tacü pexü na pegü íperütägüxũcax rü ngëmaãcü togüarü jexera na peixĩgüxũcax. Notürü name nixĩ na pegü íperüxĩragüxũ rü pegügu perüxĩnüëxũ na taxuũma peixĩgüxũ rü togü rü perü jexera na jixĩgüxũ. ⁴Rü tama pegügüxicatama perüxĩnüë, notürü pegü peporaexëëxũ na togüxũ perüngüxëëgüxũcax! ⁵Rü name nixĩ ga jema Ngechuchu ja Cristu nagu rüxĩnüxũgu na perüxĩnüëxũ i pemax. ⁶Jerü nüma rü woo ga Tupanaxũchi na jĩixũ, notürü tama nügüna nanachuxu na ínangüxuchixũ nawa ga jema. ⁷⁻⁸Rü jemacax jéma nanatax ga norü mexũgü ga dauxũgüxũ ga naãnewa. Rü wüxi i duũxũ i togüaxũ puracüxũrũũ nügü nixĩxëẽ. Rü nhama wüxi i duũxũrũũ nhama ga naãnegu nabu. Rü jexguma marü duũxũ jixĩgu ga nümax, rü nhama taxuũma jĩixũrũũ nügü nixĩxëẽ. Rü Tupanaga naxĩnü, rü jemacax curuchagu naju woo ga wüxi ga ãnexũchi na jĩixũ ga jema. ⁹Rü jemacax ga Tupana rü guxũãrũ ãëxgacüxũ najaxĩxëẽ, rü najangücuchixëẽ na guxũma i ãëxgacügüëtüwa nangëxmaxũcax. ¹⁰Rü jemaãcü nanaxü ga Tupana na Ngechuchupexegu tacaxápüxügüxũcax rü nüxũ ticuaxũüügüxũcax ja guxãma ja texé ja dauxũgüxũ i naãnewa ngëxmagüxe, rü guxãma i nhama i naãnewa ngëxmagüxe, rü guxãma ja texé ja juexũchicawa ngëxmagüxe. ¹¹Rü

jemaãcü Tupana ãëxgacüxũ najaxĩxëẽ na guxãma nüxũ ixuxũcax na tórü Cori jĩixũ ja Ngechuchu ja Cristu rü ngëmaãcü nüxũ icuaxũüügüxũcax ja Tanatü ja Tupana.

Cristuarü duũxũgü rü nhama omügürüü nixĩgü i natanüwa i ngëma duũxũgü i tama jaxögüxũ

¹²Rü nhuxma na nüxũ pecuáxũ na nhuxãcü Nanatüga naxĩnüxũ ga Cristu, rü chanaxwaxe i chauga pexĩnüë, Pa Chaueneëgü ja Pexũ Changechaũgüxe. Rü jéma petanüwa chajexmagu chauga na pexĩnüëxũãrũ jexera chanaxwaxe i chauga pexĩnüë i nhuxma na tama petanüwa changëxmaxũ. Rü chanaxwaxe i Tupanaxũ pemuũëãcüma naxcax pedaugüama i perü maxũ i taguma gúxũ. ¹³Eriü Tupana nixĩ ja perü maxũwa puracücü na pexũ nangëxmaxũcax i perü ngúchaũ i mexũ. Rü nüma nixĩ i pexũ nangũxëëxũ na naga pexĩnüëxũcax rü penaxũxũcax i ngëma nüma pexũ nanaxwaxexũ. ¹⁴Rü meã penaxũx i guxũma i ngëma pexũxũ, rü tama naxcax peidexagü rü tama pegü naxcax pechoxũgagü! ¹⁵⁻¹⁶Rü penaxwaxe i ngëmaãcü meã pemaxë na taxúema tacü rü chixexũxũ pewa ijangauxũcax. Rü penaxwaxe i mexũ i Tupanaxãcügü peixĩgü i natanüwa i ngëma duũxũgü i chixexũ rü chixëãëgümarexũ. Rü ngëxguma ngëma duũxũgümaã nüxũ peixugüjane i ngëma ore i mexũ i tüxũ maxëxëëxũ, rü joxni natanüwa rü nhama woramacurigü ja ëãnexũwa íbãixgücürüü tá peixĩgü. Rü ngëmaãcü i ngëxguma wena núma naxũxgu ja Cristu rü poraãcü tá pemaã

chataãẽ erũ tá nüxũ chadau na tama notũcaxmamare jĩxũ ga jema puracũ ga petanũwa chaxũxũ. ¹⁷Rũ ngẽma nhuxma na meã pejaxõgũxũ, rũ ngẽma nixĩ i perũ ãmare i Tupanana pexãxũ. Rũ ngẽma na meã janguxũcax i ngẽma perũ ãmare i Tupanapexewa, rũ chama rũ íchamemare na Tupanacax ichanaxãxũ i chorũ maxũ rũ chajuxũ. Rũ ngẽmacax woo chajuxgu rũ wũxi i taãẽ tá nixĩ i chauxcax. Rũ chanaxwaxe i pemagũ rũ ta ngẽmacax wũxigu chamaã petaãẽgũ. ¹⁸Rũ ngẽmacax ega ngẽma ore i mexũcax chajuxgux, rũ tama name na pengechaũgũxũ notũrũ penaxwaxe na wũxigu chamaã petaãẽgũxũ.

Timúteu rũ Epafrodítuchiga

¹⁹Rũ ngẽxguma tórũ Cori ja Ngechuchu naxwaxegu rũ paxa petanũwa chanamúega ja taeneẽ ja Timúteu na pexũ na íjadauxũcax rũ chataãẽxũcax i ngẽxguma núma nangeãgu i pechiga. ²⁰Rũ aixcuma nataxuma i to i chorũ ngũxẽerũ i chama nagu charũxĩnũxũrũ nagu rũxĩnũxũ, rũ Timúteuxicatama nixĩ. Rũ nataxuma i to i naxrũ aixcuma pegu rũxĩnũxũ rũ pexũ rüngũxẽẽchaũxũ. ²¹Erũ guxũma i togũ rũ naxcax nadaugũ i noxrõtama ngũchaũgũ, rũ tama aixcuma nagu narũxĩniẽ i ngẽma Ngechuchu ja Cristuarũ ngũchaũ. ²²Notũrũ i pema rũ marũ nüxũ pecuax na nhuxãcü meã namaxũxũ i Timúteu, rũ nhuxãcü choxũ nangũxẽẽxũ i Tupanaãrũ orearũ uchigawa, nhama wũxi i buxũ i nanatũxũ rüngũxẽẽxũrũ. ²³Rũ ngẽmacax i ngẽxguma nüxũ

chacuaxgu na nhuxãcü tá choxũ na naxũpetũxũ i núma, rũ nhuxmachi ngẽma petanũwa chanamuxchaũ i Timúteu na pexũ íjadauxũcax. ²⁴Rũ ngẽxgumarũ ta nagu charũxĩnũ rũ tórũ Cori rũ aixcuma tá choxũ narüngũxẽẽ na chamatama ngẽma petanũwa íchajadauxũcax. ²⁵Rũ ngẽxgumarũ ta rũ chauxcax name nixĩ i ngẽma petanũwa chanamuxũ i taeneẽ i Epafrodítu. Rũ núma nixĩ ga pematama chauxcax núma penamuxũ na choxũ nangũxẽẽxũcax. Rũ núma rũ chamücü nixĩ i Tupanaãrũ puracũwa, rũ poraãcü choxũ narüngũxẽẽ i Tupanaãrũ orearũ uwa. ²⁶Rũ poraãcü nüxũ nangũchaũ na pexũ íjadauxũ i guxãma i pemax. Rũ poraãcü naxoegaãẽ, jerũ pema rũ nüxũ pecuáchiga ga na jaðaawexũ ga nümax. ²⁷Rũ aixcuma nixĩ ga na jaðaawexũ, rũ wixguxũchi taax naju. Notũrũ Tupanaãxũ nangechaũtũmũ rũ chama rũ ta nüxũ changechaũtũmũ, rũ jemacax naxcax najataanexẽẽ na tama jexeraãcü changechaũxũcax. ²⁸Rũ ngẽmacax rũ jexeraãcü chanaxwaxe na paxa petanũwa chanamuxũ i Epafrodítu, na pema rũ petaãẽgũxũcax i ngẽxguma wena nüxũ pedaugũgu. Rũ ngẽxguma i chama rũ tá ta chataãẽ i ngẽxguma nüxũ chacuaxgu na petanũwa nangẽxmaxũ na pexũ nangũxẽẽxũcax. ²⁹Rũ chanaxwaxe i tórũ Coriéga gu petaãẽgũãcüma meã penajaxu erũ peeneẽ nixĩ. Rũ name nixĩ i nüxũ pengechaũgũ i guxũma i ngẽma duũxũgũ i Epafrodíturũ ixĩgũxũ. ³⁰Jerũ núma ga Epafrodítu rũ jema na poraãcü nawa napuracũxũ ga Cristuarũ puracũ, rũ jemacax wixguxũchi taax naju. Rũ

ãücümáxũwa nügü najexmaxẽẽ na pechicüü choxũ nangũxẽẽxũcax.

**Ngẽma na Cristuxũ icuáxũ rü
ngẽma nixĩ i guxũãrũ jexera
rümemaẽxũ**

3 1Rü nhuxma Pa Chaueneëgüx, rü chanaxwaxe i petaãëgü erü törü Coriarü duũxũgü peixĩgü. Rü jema ore ga noxri pexcax chaxümatixũ rü tama choxũ nawaxtümüü na wena pexcax chanaxümatixũ erü aixcuma pexũ name i ngẽma ore. 2;Rü pegüna pedax nüxna i ngẽma duũxũgü i chixri maxẽxũ rü chixexũmaã pexũ ixucuxëgüxũ! Rü nümagü nixĩ i nüxũ jaxugüexũ rü ngëxguma tama jigü íiwiechaxmüpexechiraũgu, rü taxucürüwama Tupanapexewa time. 3Notürü jíxema aixcuma Tupanapexewa imexë, rü jixema tixĩgü. Rü Tupanaxũ ticuaxũgü i Naãë i Üünexũãrũ ngũxẽemaã. Rü tataãëgü erü Ngechuchu ja Cristuarü duũxũgü tixĩgü. Rü tama tajaxögü na ngẽma jigü íiwiechaxmüpexechiraũxũcax Tupanapexewa imexũ. 4Notürü chama chi waxi nixĩ i guxũ i togüãrũ jexera chajaxõxũ i ngẽma wiechaxmüpexechiraũchiga. Rü tataxu chima ja togue ja texé chauxrüü jaxóxë i ngëmachiga. 5Jerü jexguma 8 ga ngunexũ chauëtü jixĩgu ga na chabuxũ, rü choxũ ínawiechaxmüpexechiraũgü, erü Judéu chixĩ. Rü Bejamítanüxũ chixĩ. Rü chaunatü rü chauë rü Judéugü tixĩgü, rü ngëmacax i chama rü Judéuxũchi chixĩ. Rü chama rü Parichéuchirëx chixĩ, rü pema nüxũ pecuax rü ngẽma Parichéugü rü meãma

nanaxaure i Tupanaãrũ mugü ga Muísë ümatixũ. 6Rü jema na meã chajanguxëëchaũxũcax ga jema mugü ga Muísë ümatixũ, rü jemacax nawe chingëchigü ga jema duũxũgü ga Ngechuchuaxũ jaxögüxũ. Rü jema na aixcuma meã chanaxaurexũcax ga jema mugü ga Muísë ümatixũ, rü jemacax rü taxucürüwama texé chauchigaxũ tixu ga tama na chaxaurexũ. 7Notürü guxũma ga jema üpa chauxcax mexũ, rü nhuxma rü taxuwama choxũ name rü marü íchanatax na Cristuaxũxĩcatama chajaxõxũcax. 8Rü nhuxma na Ngechuchu ja Cristu ja chorü Corixũ na chacuáxũ, rü chauxcax rü guxũma ga jema üpa nagu chixũxũ rü taxuwama name, erü ngẽma na Cristuxũ na chacuáxũ rü guxũãrũ jexera narümemaë. Rü guxũma ga jema noxri nagu chixũxũ rü marü nüxũ charüxo na Cristuwe charüxũxũcax rü noxrü duũxũ na chĩxũcax. Rü chauxcax rü nhama guxchirerüü nixĩ ga jema üpa nagu chixũxũ ega Cristumaã nügü chananguxgu. 9Rü jemaãcü nüxũ charüxo ga guxũma ga jema na Cristuarü duũxũ na chĩxũcax. Rü nhuxma rü Tupanapexewa chame erü Cristuaxũ chajaxõ. Rü tama ngẽma na chamecümáxũcax rü exna mugü chaxaurexũcax nixĩ na chamexũ i napexewa. Notürü ngẽma na Cristuaxũ chajaxõxũcax nixĩ i nügücax choxũ namexëëxũ ja Tupana. 10-11Rü ngẽma nhuxma chanaxwaxexũ nixĩ na aixcuma Cristuxũ chacuáxũ rü chawa na nangëxmaxũ i ngẽma pora ga wena Cristuxũ írudaxëëxũ i nhuxma nüxũ ngëxmaxũ. Rü jema ngüxũ na jangexũ

ga nūma rü na najuxũ rü
ngëxgumarũtama chanaxwaxe i
íchamemare na naxçax ngúxũ chingexũ
rü naxçax chajuxũ na jixcama chama rü
ta juwa ícharũdaxũçax.

**Pauru naxçax nadau na Cristuçax
namaxũxũ nhuxmatáta
Tupanaxũtawa nangu**

¹²Rü nhuxma na ngëma nhachaxũ
pemaã rü tama chanaxwaxe i nagu
perũxĩnũe na guxũxũ chacuáxũ i
Cristuchiga, rü exna guxũwama na
chamexũ. Notürũ guxũ i ngunexũgu rü
naxçax chadauama na Ngechuchu ja
Cristuarũ ngúchaũ na chaxũxũçax, jerũ
jemacax nixĩ ga nūma ga chauxçax
nadauxũ ga noxrix. ¹³Pa Chaueneëgũx,
pemaã nüxũ chixu rü chamatama meãma
nüxũ chacuax rü nhuxma rü ta tautama
nawa changu i ngëma naxçax chadauxũ.
Notürũ i nhuxma rü marũ nüxũ
ícharũngũma i guxũma ga jema noxri
nagu chixũxũ. Rü nhuxma rü chaugũ
chaporaxëe na aixcuma Cristuçax na
chamaxũxũ na nawa changuxũçax i
ngëma maxũ i chapexewaama ngëxmaxũ.
¹⁴Rü ngëmacax i nhuxma rü naxçax
chadau na aixcuma Cristuçax chamaxũxũ
nhuxmatáta Tupanaxũtawa changu. Erũ
chanajauxchaũ i ngëma ãmare i nūma
dauxũguxũ i naãnewa naxçax taxçax
nangemaxũ i jixema na Ngechuchu ja
Cristuarũ duũxũgũ ixĩgũxũ. ¹⁵Rü guxãma
i jixema na aixcuma Cristuaxũ jaxõgũxũ,
rü name nixĩ i ngëmaãcü nagu tarũxĩnũe.
Notürũ ngëxguma chi texé i petanũwa
toguama tarũxĩnũgu, rü Tupana tá tũxũ
nüxũ nacuaçxëe i ngëma nūma
nanaxwaxexũ na nüxũ tacuáxũ. ¹⁶Rü

ngëma inaxwaxexũ nixĩ na aixcuma naga
ixĩnũeëchaxũ rü meãma nagu ixĩxũ i
ngëma ore i marũ nüxũ icuáxũ. ¹⁷Pa
Chaueneëgũx, chanaxwaxe i chauxrũũ
nagu pexĩ i ngëma pexũ nüxũ
chadauxëxũ na namexũ. ¡Rü penangugũ
na nhuxãcü meã namaxëxũ i ngëma togũ
i duũxũgũ i toma tamaxëxũãcũma
maxëxũ! ¹⁸Rü marũ muëxpũçũcũna
pemaã nüxũ chixu, rü nhuxma rü
changechaũãcũma rü chaxauxãcũma
wena pemaã nüxũ chixu rü nangëxma i
muxũma i duũxũgũ i Cristuarũ
uwanürũãcũma maxëxũ. Rü nūmagũ rü
tama nüxũ nacuaçxgiçhaũ na Cristu
curuchagu naxçax juxũ. ¹⁹Notürũ ngëma
duũxũgũ rü tá dũxwa inajarũxo. Rü
ngëma naxũneãrũ ngúchaũ nixĩ i norũ
tupana ixĩxũ. Rü woo nüxũ nacuaçxchirex
na wũxi i ãne na jiĩxũ i ngëma chixexũ
notürũ namaã nataãëgũama. Rü nhama i
naãneãrũ ngëmaxũguxicatama
narũxĩnũe. ²⁰Notürũ i jixema rü
dauxũguxũ i naãnewa tũxũ nangëxma i
tachica. Rü ítananguxëe na dauxũguxũ i
naãnewa taxçax ne naxũxũ ja tórũ Cori ja
Ngechuchu ja Cristu ja tórũ Maxëxëerũ.
²¹Rü nhaã taxũne i juxwaxexũ rü nūma
ja Cristu tá nanaxũchicũũ na naxũne i
mexëchixũrũũ jiĩxũçax. Rü ngëma norũ
pora i namaã guxũëtũwa nangëxmaxũ,
rü ngëmamaãtama tá nanaxũchicũũ i
taxũne na noxrürũũ jiĩxũçax.

**Nhuxma na tórũ Coriarũ ixĩgũxũ rü
name nixĩ na guxũguma
namaã itaãëgũxũ**

4 ¹Rü nhuxma Pa Chaueneëgũ ja
Pexũ Changechaũgũxe rü Poraãcü
Pexũ Chadauxchaũgũxe, rü ngëma marũ

pemaã nüxũ chixuxũrũũ chanaxwaxe i meã tórũ Coricax pemaxẽ erũ pema nixĩ i chorũ taãẽ rũ chorũ ãmare i Tupana choxna ãxũ peixĩgũxũ. ²Rũ nüxũ chacaãxũ i taejaxgũ i Eudía rũ Chítique na nügümaã nangüxmüëxũçax, erũ nümagũ rũ tórũ Corixacũgũ nixĩgũ. ³Rũ cumax, Pa Chamücü ja Mecü i Wüxigu Tupanaãrũ Puraciüwa Chamaã Puracücüx, rũ cuxna naxçax chaca na nüxũ curüngũxẽëxũçax i ngẽma taxre i taejaxgũ, erũ nümagũ rũ wüxigu chamaã rũ Crementemaã rũ ngẽma togũ i chamücügũ i Tupanaãrũ poperawa marũ ngoxégagũxũmaã napuracüie i Tupanaãrũ orearũ uwa. ⁴Rũ nhuxma na tórũ Coriarũ peixĩgũxũ, Pa Chaueneëgũx, rũ name nixĩ i guxũguma namaã petaãëgũ. Rũ wena pemaã nüxũ chixu, rũ ¡petaãëgũ! ⁵Rũ chanaxwaxe i meã pemaxẽ na guxũma i duũxũgũ pexũ nacuxãgũxũçax na aixcuma mexũ i duũxũgũ na peixĩgũxũ. ¡Rũ nüxna pecuxãchie na tórũ Cori rũ paxa tá nataeguxũ na núma naxũxũ! ⁶¡Rũ taxuũçaxma penaxixãchiãëgũ! Notürũ ngëxguma woo ãacü pexũ üpetũgũ rũ guxũguma name nixĩ na Tupanamaã nüxũ peixuxũ i perũ jumuxẽwa. ¡Rũ naxçax ípeca i norũ ngũxẽë i ngëxguma ãacü pexũ guxchaxgu, rũ moxẽ nüxna pexãgũ! ¡Rũ ngẽmaãcü Tupanamaã nüxũ peixu i guxũma i ngẽma nüxna naxçax pecagũchaũxũ! ⁷Rũ ngẽmaãcü i núma ja Tupana rũ tá pexũ nataãëxẽë namaã i wüxi i taãẽ i mexëchixũ i guxũma i taãẽ i nüxũ icuáxũãrũ jexera mexëchixũ. Rũ nhuxma na Ngechuchu ja Cristuarũ duũxũgũ peixĩgũxũ, rũ ngẽma taãẽ i Tupana pexna ãxũ rũ tá

nüxna pexũ ínapoxũ i ngẽma chixexũ i nagu perũxĩntüëchaxũ.

Name nixĩ i nagu tarũxĩnũë i guxũma i ãacü i aixcuma mexũ ixĩxũ

⁸Rũ nhuxma Pa Chaueneëgũx, rũ name nixĩ i nagu perũxĩnũë i guxũma i ngẽma ore i aixcuma ixĩxũ, rũ guxũma i ngẽma nacüma i taxucürüwama texë chixri nachiga idexaxũ. Rũ ngẽmaãcü rũ name nixĩ i nagu perũxĩnũë i guxũma i ngẽma ore i aixcuma meã iwéxũ rũ guxũma i ngẽma Tupanapexewa mexũ, rũ guxũma i ngẽma mexũ i duũxũgũ namaã taãëxũ, rũ guxũma i ngẽma aixcuma duũxũgũpexewa mexũ. Rũ name nixĩ i ngẽmagu perũxĩnũë. ⁹Rũ chanaxwaxe i aixcuma penaxü i ngẽma pexũ changüxẽëxũ, rũ ngẽma pexũ namaã chixucuxëgũxũ, rũ ngẽma chauxõtawa nüxũ pexĩnũëxũ, rũ ngẽma chauxõtawa nüxũ pedauxũ na chanaxũxũ. Rũ ngëxguma ngẽmaãcü pemaxëgu rũ pemaã tá inarũxãũx ja Tupana ja tamaã irüngüxmücü rũ tüxũ taãëxẽëcü.

Jema Piripucũăx ga jaxögũxũ rũ ãiërumaã Pauruxũ narüngũxẽëgũ

¹⁰Rũ nhuxma na chorũ Coriarũ chĩxũ, rũ poraãcü chataãë erũ wenaxãrũ choxna pecuxãchie rũ choxũ perüngũxẽë. Rũ chama nüxũ chacux rũ pema rũ guxũguma choxũ perüngũxẽëchaũ, notürũ taguma pexũ natauxcha ga na penaxũxũ ga jema. ¹¹Rũ tama ngẽma na ãacü choxũ taxuxũçax nixĩ i pemaã nüxũ chixuxũ i ngëmachiga. Erũ chama rũ marũ

chamaã nixü na namaã chataãëxũ i ngẽma choxũ ngẽxmaxũ. ¹²Rü nüxũ chacuax na nhuxãcü na jiixũ ega guxũ choxũ tauxgux, rü nüxũ chacuax na nhuxãcü na jiixũ ega choxũ namuxũchixgu. Rü marü chamaã nixü na namaã chataãëxũ i ngẽma choxũ ngẽxmaxũ woo changaxpütüwegu, rü exna woo chataijaxgu, rü exna woo choxũ namuxũchixgu rü exna woo choxũ natauxguma. ¹³Rü Cristu nixĩ ja choxũ poraxëeci, rü ngẽmacax chamaã nanguxũ na chanaxũxũ i guxũma i ngẽma Tupana naxwaxexũ na chanaxũxũ. ¹⁴Notürü ga pema rü wüxi ga mexũ choxũ pexügü ga jexguma choxũ natauxjane choxũ perüngũxëëgügu. ¹⁵Rü pema, Pa Jaxögüxũ i PiripucũĀx, rü meãma nüxũ pecuax rü jexguma noxri Machedóniãñewa nüxũ chixuxgu ga Tupanaãrü ore, rü jexguma jéma íchaxũxũgu, rü pexicatama nixĩ ga ãmare choxna pexãxũ naxçax ga jema ngũxëë ga chauxũtawata pejaxuxũ. ¹⁶Rü jexguma Techarónicaarü ãñewa chajexmajane, rü pema rü jéma chauçax penamugü ga perü ãmare na choxũ perüngũxëëgüxũçax. Rü tama wüxicanaxĩcatama nixĩ ga jemaãcü choxũ na perüngũxëëgüxũ. ¹⁷Rü woo perü ãmaremaã chataãë, notürü jexeraãcü chataãë erü ngẽma choxũ na perüngũxëëgüxũçax rü Tupana tá ãmare pexna naxã. ¹⁸Rü nhuxma rü marü choxũ nangẽxma i guxũma i tacü

i chanaxwaxexũ, rü aixcuma ngẽmaãrü jexera choxũ nangẽxma. Rü nhuxma na Epafrodítu núma nangexũ i perü ãmare, rü taxuũma choxũ nataxu. Rü ngẽma perü ãmare i chauçax núma pemuxũ, rü Tupanapexewa rü namexëchi, rü núma rü poraãcü namaã nataãë. ¹⁹Rü ngẽmacax ja chorü Tupana rü norü ngẽmaxũgü i mexëchixũwa tá pexna nanaxã i guxũma i tacü i pexũ taxuxũ. Rü ngẽmaãcü tá nanaxü erü Ngechuchu ja Cristuarü duũxũgü peixĩgü. ²⁰Rü name nixĩ i guxũguma nüxũ ticuaxũügü ja Tanatü ja Tupana. Rü ngẽmaãcü jiixũ.

**Pauru nanaguxëë ga norü popera rü
wenaxãrü jema duũxũgüxũ
narümoxë**

²¹Rü chanaxwaxë i chauégagu nüxũ perümoxëgü i guxũma i taeneëgü i Ngechuchu ja Cristuaxũ jaxögüxũ. Rü ngëxgumarüũ ta pexũ narümoxëgü i ngẽma taeneëgü i chauxũtawata ngëxmagüxũ. ²²Rü ngëxgumarüũ ta pexũ narümoxëgü i guxũma i taeneëgü i núma Romawa ngëxmagüxũ. Rü ngẽma jexera pexũ rümoxëgüxũ rü ngẽma nixĩ i taeneëgü i Romaãrü ãëxgacü ja tacüxũtawata puracüexũ. ²³Rü chanaxwaxë i tórü Cori ja Ngechuchu ja Cristu pexũ narüngũxëë i guxãma i pemax. Rü ngẽmaãcü jiixũ.

*Rü nuãma pexna,
Pauru*